



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁRIU

**Komunikadu Imprensa**  
**27 Abril 2023**

**JSMP lansa relatóriu Anuál Setór Justisa, Lejislativu, Institusionál 2022 no relatóriu temátiku kona-ba Rekoñesimentu ba Kazamentu tuir Kódigu Sivíl, Labarik Joven Konflitu ho Lei no Direitu sira Ema ho Defisiénsia iha âmbito Selebrasaun Aniversáriu JSMP ba dala XXII**

Iha 28 Abril 2022, JSMP selebra ninia aniversáriu ba dala XXII no iha tempu hanesan halo lansamentu ba relatóriu 6 (neen) mak hanesan **Relatóriu Observasaun Jerál Setór Justisa (OJS) 2022, Relatóriu Programa Observasaun Parlamentár (POP) 2022, Relatóriu Institusionál 2022 no relatóriu temátiku kona-ba Rekoñesimentu ba Kazamentu tuir Kódigu Sivíl, Ema ho Defisiénsia no Labarik Joven Konflitu ho Lei.**

Relatóriu anuál 3 (tolu) ne'e fó sai kona-ba rezultadu observasaun regulár JSMP nian iha Tribunál no Parlamentu Nasionál, atividade advokasia, assisténsia legál ba vítima feto no labarik, treinamentu no kapasitasaun, enkontru sira no gastu sira ba iha atividade JSMP nian durante tinan 2022.

Enkuantu relatóriu temátiku tolu ne'e, relatóriu temátiku ida iha relasaun ho provizaun Artigu 1475 Kódigu Sivíl kona-ba rekoñesimentu ba kazamentu, relatóriu temátiku kona-ba Ema ho defisiénsia no relatóriu temátiku kona-ba labarik joven sira konflitu ho lei.

Hanesan tinan sira antes, kada tinan iha selebarasaun JSMP nia Aniversáriu, JSMP lansa relatóriu importante rua ne'ebé relata kona-ba dezvoltamentu, progresu no dezafiu sira iha sistema judisiáriu no iha prosesu lejislativu. Iha tinan ida ne'e JSMP oferese mós rezultadu serbisu advokasia balu liuhusi relatóriu temátiku sira iha relasaun ho asuntu rekonesimentu ba kazamentu, ema ho defisiénsia no labarik joven sira konflitu ho lei. JSMP mós iha planu atu prepara no públika tan relatóriu temátiku balun kona-ba kestaun inestu, korrupsaun no kazu violénsia bazeia ba jéneru. Enkuantu relatóriu seluk relata kona-ba JSMP ninia atividade sira ne'ebé implementa iha tinan 2022," dehan Sra. Ana Paula Marcál, Diretora Ezekutiva JSMP.

Relatóriu Observasaun Jerál Setór Justisa fó sai kona-ba progresu no dezafiu sira iha setór justisa nian, elaborasaun situasaun ka kazu sira violénsia bazeia ba jéneru, relata JSMP nia atividade assisténsia legál ba vítima feto no labarik inklui estatística kazu sira ne'ebé prosesa iha tribunál distritál sira no Tribunál Rekursu durante tinan 2021.

Relatóriu Observasaun Parlamentár fó sai kona-ba funsionamentu Parlamentu Nasionál liga ho produtividade parlamentu iha lejislasaun nian no halo analiza kona-ba influénsia política iha prosesu lejislasaun sira iha Parlamentu Nasionál.

Relatóriu Instituisaun fó sai kona-ba atividade sira JSMP nian durante tinan 2021 inklui kooperasaun institusionál tantu nasional no internasionál. Relatóriu ne'e mós deskreve apoiu finansiamentu ne'ebé JSMP simu husi doador sira nu'udar justifikasaun no forma akuntabilidade ba públiku.

Enkuantu relatóriu tématiku haat ne'e, relatóriu tématiku ida iha relasaun ho kazamentu sivil ne'ebé relatóriu ne'e subliña no relata kestaun kona-ba provizaun Artigu 1475 LKS nian ne'e hamosu preokupasaun husi preokupasaun konfisaun relijioza sira seluk alende Katóluka, tanba konsidera lei ne'e la asegura no promove ema hothotu nia direitu, la justu no legaliza aktu diskriminasaun hasoru Timoroan sira ne'ebé la'ós Katóluku bainhira ba trata Sertidaun RDTL no Sertidaun Kazamentu RDTL nian. Alende ne'e relatóriu tématiku kona-ba Ema ho Defisiénsia ne'ebé subliña no relata kona-ba problema sira ne'ebé ema ho defisiénsia sira hasoru, kestaun sira kona-ba asesibilidade nomós alokasaun orsamentu ne'ebé la espesifiku ba ema ho defisiénsia sira no relatóriu ida seluk kona-ba labarik joven konflitu ho lei, ne'ebé foku ba labarik foinsa'e sira ne'ebé oras ne'e iha prizaun Becora no ladun hetan akompañamentu ne'ebé di'ak husi parte defeza.

Relatóriu ne'e konklui ho rekomendasaun importante no relevante balun ne'ebé dirije diretamente ba órgaun no instituisaun kompetente sira atu bele tau iha konsiderasaun. JSMP hein katak rekomendasaun importante hirak ne'e bele hetan konsiderasaun hodi hadi'ak funsionamentu sistema justisa formál no lejislativu iha agora no ba futuro. Relatóriu sira ne'e bele asesu iha JSMP nia website <https://jsmp.tl/>

Selebrasaun aniversáriu no lansamentu relatóriu sira ne'e, JSMP mós hetan mensajen husi parte relevante sira ne'ebé iha jerál hotu-hotu kontinua apoia JSMP iha JSMP nia atividade tomak.

Atu hetan informasaun liután favor kontaktu:

Ana Paula Marçal  
Diretora Ezekutivu JSMP  
Telefone: 3323883 | 77040735  
Website : <https://jsmp.tl/>